

Aruba su lucha cu traficacion di hende y e necesidad pa mas accion

E ‘2024 Trafficking in Persons Report: Aruba’ (Informe di Traficacion di Persona (TIP) 2024), publica pa U.S. Department of State na juni 2024 un biaha mas a coloca Aruba riba Tier 2, reconociendo su esfuersonan den combatimento di traficacion di hende mientras cu tambe ta expone deficiencianan critico.

E informe ta resalta fayonan sistematico continuo den persecucion, proteccion di victima y coordinacion institucional. Mientras cu e gobierno nobo ta preparando pa asumi su cargo, e tin un responsabilidad urgente pa atende e deficiencianan aki y provee e Centro di Coordinacion riba Traficacion di Hende y Contrabando di Migrante (CMMA) cu e recursonan necesario pa implementa completamente e recomendacionnan describi den e informe.

Stancamento den persecucion: Un preocupacion mayor

E informe ta señala cu pa di cinco año consecutivo, Aruba a faya den persigui of condena un solo traficante. E falta persistente aki di responsabilidad ta fomenta un cultura di impunidad, curashando traficantenan y lagando victimanan sin proteccion. Aunke e gobierno a modifica su ley contra traficacion pa inclui criminalidad forsa y mendigamento forsa como delito di traficacion, e ausencia di aplicacion ta haci e avancen legal aki inefectivo. E gobierno mester bay priorisa investigacionnan vigoroso y persecucionnan, sigurando cu traficantenan ta ricibi sentencianan di prizon significativo cu ta sirbi como un medida di descurasha e tipo di practicanan aki.

Medidanan debil di identificacion y proteccion di victima

Aruba a identifica solamente un victima di traficacion na 2023, un caida drastico compara cu añanan anterior. E falta di operacion di e refugio di uzo mixto, combina cu e falta di acuerdonan formalisa cu proveedornan di servicio, ta laga victimanan sin apoyo adecua. E administracion nobo lo mester sigura e operacion di un refugio dedica pa victimanan di traficacion y elimina bareranan burocratico cu ta stroba acceso na servicio. Ademá, funcionarionan cu no ta autoridadnan di ley mester wordo empodera pa designa victimanan di traficacion, permitiendo nan ricibi atencion sin tardansa liga na investigacionnan criminal.

Coordinacion y fondo insuficiente

E informe TIP ta resalta fayonan di coordinacion significativo entre institucionnan clave contra traficacion, particularmente entre e Unidad di Traficacion di Hende y Contrabando di Migrante (UMM), e Unidad Interdisciplinario Conhunto riba Traficacion di Hende y Contrabando di Migrante (JIUMM) y e oficina di fiscal nacional. E ineficiencia aki a impedi investigacionnan activo di sigui. Ademá, CMMA lo ta keda sin tin

suficiente fondo y lo ta falta status institucional formal, limitando su capacidad pa dirigi esfuersonan contra traficacion efectivamente. E gobierno nobo mester bay formalisa CMMA inmediatamente como un institucion permanente cu un presupuesto dedica pa sigura sostenibilidad a largo plaso.

Deficiencianan den training y conscientisacion

A pesar di iniciativanan di training aumenta, e informe ta resalta preocupacionnan cu oficialnan di polis di primera linea y personal di centro di detencion di migrante ta falta conocimiento adecua pa identifica victimanan di traficacion. E confusion continuo di traficacion di hende cu contrabando di migrante ta complica mas ainda e esfuersonan di intervencion.

Aruba mester expande programanan di training pa autoridatnan di ley, fiscal, hues y inspector di labor, enfatisando un enfoque centra riba victima y informa riba trauma. Ademá, campananan di conscientisacion publico mester diferencia claramente traficacion di hende for di contrabando pa fomenta un comprension mas preciso di e crimen.

E caminda pa futuro: Responsabilidad gubernamental ta clave

E gobierno nobo tin un oportunidad—y un obligacion moral—pa coregi e fayonan di hopi tempo aki.

Pasonan inmediato mester inclui:

- Aumenta financiamiento pa CMMA y formalisa esaki como un institucion permanente.
- Mehora coordinacion entre agencianan pa racionalisa investigacion y persecucionnan.
- Pone e refugio di uzo mixto den operacion pa provee vivienda sigur pa victimanan.
- Expande esfuersonan di identificacion di victima, particularmente entre poblacionnan vulnerabel manera trahadonan migrante, trahadonan domestico y personanan den sexo comercial.
- Sigura cu tur caso di traficacion ta wordo investiga y persigui, cu sentencianan significativo impone riba traficantenan condena.

Si e pasonan aki no wordo tuma, Aruba ta core riesgo di keda stanca den su esfuersonan contra traficacion, poniendo su status di Tier 2 na peliger den futuro rapportnan TIP. E gobierno lo mester demostra boluntad politico y accion concreto pa eradica traficacion di hende y proteha esnan mas na riesgo.

Referencia:

- U.S. Department of State. (2024).
- Trafficking in Persons Report: Aruba.